

## Allaah Taa'alā Kī Pasand

**Injeel : Mattā 5:17-48**

[Īsā<sup>(a.s)</sup> ne logoñ ko taaleem dete hue kahā:] “Tum log ye bilkul mat socho ki main Musā<sup>(a.s)</sup> ke qaanun aur paigambaroñ kī hidaayat ko khatm karne āyā huñ balki main unko purā karne āyā huñ.<sup>(17)</sup> Main tumko sacchaāi bataatā huñ, jab tak ye zameen aur āsmaan khatm naheen ho jaate aur jab tak har kahī huī baat purī naheen ho jaatī tab tak Allaah taa'alā ke kalaam kā choṭe se choṭā lafz bhī salaamat rahegā.<sup>(18)</sup> Islie, jo bhī hukm ko naheen maanegā chaahē wo choṭā hī kyuñ nā ho aur dusrōñ ko bhī amal karne se rokegā to wo Allaah taa'alā kī saltanat me sabse neechē darze par hogā. Lekin jo bhī Allaah taa'alā ke hukm par amal kartā hai aur dusrōñ ko bhī sikhaatā hai to wo Allaah taa'alā kī saltanat me azeem muqaam par hogā.<sup>(19)</sup>”

“Sunō, main tumse kahtā huñ ki tumko, deenī qaanun sikhaane waale ustaadoñ aur Fareesiyōñ se zyaadā nek honā padegā. Agar tum Allaah taa'alā ko utnā pasand naheen ho jitnā wo log haiñ, to tum log uskī saltanat me kabhī daakḥil naheen ho paoge.<sup>(20)</sup>”

“Tum ne sunā hai [ki Musā<sup>(a.s)</sup> ne Taurait shareef me] ek zamaanā pahale logoñ se kyā kahā thā, ‘Tum kisī kā kḥun mat bahaanā. Koī bhī ādmī jo kisī kā kḥun karegā to uskā hisaab hogā.<sup>(21)</sup> Lekin main tumse kahtā huñ ki jo bhī insaan apne bhaāi se naaraaz hogā to wo muqadme ke faisle me gunaahgaar saabit hogā. Agar tum kisī kī beizztī karoge to sabse baḍī adaalat me mujrim saabit hoge, lekin agar tum kisī ko bewaquf bhī kahoge to tumhaarā itnā gunaah hī kaafī hai ki tumko jahannum kī āg me pheñk diyā jae.<sup>(22)</sup>”

“Islie agar tum Allaah taa'alā ko koī nazraanā pesh kar rahe ho, [yā uskī ibaadat kar rahe ho] aur tumko yaad āe ki tumse koī naaraaz hai,<sup>(23)</sup> to phir tum apnī ibaadat choḍ kar us insaan se sulah karne ke liye jao. Uske baad waapas ā kar apnī ibaadat karo.<sup>(24)</sup> Apne dushman se sulah kar lo jab tum uske saath raaste me ho, isse pahale ki wo qazāi ke paas chalā jae. Qazāi tumko ek sipaahī ke hawaale kar degā aur tumko jel me qaid kar diyā jae.<sup>(25)</sup> Main tumko ek sach bataatā huñ: Tum wahañ se jab tak naheen nikal paoge jab tak tum apnā har qarz chukā naheen dete.<sup>(26)</sup>”

[Īsā<sup>(a.s)</sup> ne logoñ se kahā:] “Tumne sunā hai [ki Musā<sup>(a.s)</sup> ne Taurait shareef me kyā kahā hai], ‘Tum zinā mat karnā.<sup>(27)</sup> Lekin main kahtā huñ ki jis kisī ne bhī aurat par gandī nazar daali to usne apne dil me zinā kiyā.<sup>(28)</sup> Agar tumhaarī seedhī āñkh gunaah kartī hai, to usko baahar nikaal kar pheñk do. Pure jism ko jahannum kī āg me jalaane se acḥā hai ki apne jism kā wo hissā hī nikaal do.<sup>(29)</sup> Agar tumhaarā seedhā haath gunaah karwaatā hai to usko kaat kar pheñk do. Pure jism ko jahannum me jaane se behatar hai apne jism ke ek hisse ko alag kar do.<sup>(30)</sup>”

“Taurait shareef me Musā<sup>(a.s)</sup> kā qaanun ye kahtā hai, ‘Koī bhī ādmī jo apnī aurat ko waapas bheje to use talaaq naamā likh kar de.<sup>(31)</sup> Lekin main kahtā huñ ki agar koī apnī beewī ko zinā ke alaawā kisī aur gunaah ke jurm kī wajah se talaaq de rahā hai to wo apnī beewī ko zinā ke raaste par dhakel rahā hai. Jo koī bhī kisī talaaq dī huī aurat se shaadī kar rahā hai to wo zinā kā gunaahgaar hai.<sup>(32)</sup>”

“Aur tumne sunā hai ki pahale logoñ se [Taurait shareef me] kyā kahā gayā thā, ‘Jhuṭī qasam mat khaao aur Allaah taa'alā se kare hue waade ko nibhaao.<sup>(33)</sup> Lekin main tumheñ bataatā huñ, tum bilkul bhī qasam mat khaao. Tum āsmaan kī qasam mat khaao, kyuñki wo Allaah taa'alā kā takḥt hai.<sup>(34)</sup> Tum zameen kī qasam bhī mat khaao, kyuñki ye zameen bhī Allaah taa'alā kī hai. Tum Yerushalam kī qasam bhī mat khaao kyuñki wo azeem baadshaahoñ kā shahar hai.<sup>(35)</sup> Yahañ tak ki tum apne sar kī qasam bhī mat khaao. Kyuñki tum apne sar ke ek baal ko bhī kaalā yā safed ugā naheen sakte.<sup>(36)</sup> Iske badle, tum sirf ‘Hañ’ kaho agar tumhaarā matlab ‘Hañ’ hai aur ‘Naheen’ kaho agar tumhaarā matlab ‘Naheen’ hai. Agar tum iske alaawā kuch kahte ho, to wo gunaah hai.<sup>(37)</sup>”

[Īsā<sup>(a.s)</sup> ne jamā logoñ se kahā] “Tumne sunā hai ki kyā kahā gayā hai, ‘Āñkh ke badle āñkh, aur dañt ke badle dañt.<sup>(38)</sup> Lekin main tumse kahtā huñ, kisī gunaahgaar se mat laḍo. Jo bhī tumhaare ek gaal par tamaachā maare to tum use apnā dusrā gaal bhī de do.<sup>(39)</sup> Jo bhī adaalat me tum par muqadmā kare aur tumhaarī kameez le le to tum use apnā koṭ bhī le jaane do.<sup>(40)</sup> Jo bhī tumheñ apne saath ek meel chalne ke liye majbur kare, to tum uske saath do meel chal kar jao.<sup>(41)</sup> Jo bhī tumse kuch maañge to use manā mat karo. Koī bhī tumse udhaar maañgne āe to usse apnā muñh mat moḍo.<sup>(42)</sup>”

“Tumne ye sunā hai, ‘Apne paḍosī se mohabbat karo aur dushmanoñ se nafrat.<sup>(43)</sup> Lekin main tumse kahtā huñ ki apne dushmanoñ se bhī pyaar karo. Unke liye duā karo jo tumhaare saath burā karte haiñ.<sup>(44)</sup> Agar tum aisā

karoge to apne rab ke sacche bande kahalaaoge. Allaah taa'alā suraj ko apne donoñ bandoñ ke liye ugaatā hai chaahe wo nek hoñ yā gunaaahgaar. Wo baarish ko bhī apne donoñ bandoñ ke liye bhejtā hai.<sup>(45)</sup> Agar tum sirf unse mohabbat karte ho jo tumse karte haiñ, to tumko uske liye inaam kyuñ mile? Kyuñki ye kaam to beeemaan ṭaiks wasulī karne waale bhī karte haiñ.<sup>(46)</sup> Agar tum sirf apne bhaaeeyoñ ko hī salaam karte ho, to tum aur logoñ se alag kyā kar rahe ho? Ye kaam to wo log bhī karte haiñ jo Allaah rabbul azeem par īmaan naheen rakhte.<sup>(47)</sup> Islie, tumko sab se acḥā bannā hogā, jis tarah se āsmaan me tumhaarā parwardigaar sab se acḥā hai."<sup>(48)</sup>